

四庫全書

集部

欽定四庫全書

集部

西晉文紀卷十五

詳校官庶吉士

臣初喬齡

主事銜

臣徐以坤覆勘

覆校官博士

臣劉光第

校對官中書

臣范鏊

謄錄監生

臣王增聞

欽定四庫全書

西晉文紀卷十五

明 梅鼎祚 編

西晉

十五

陸機

字士衡吳郡人吳丞相遜之孫領父抗兵為牙門將吳亡歸晉歷平原內史為成都王河

北大都督軍敗以官人孟玖等讐害之

薦賀循郭訥疏

晉書循為武康令有惠政久不進敘著作郎陸機薦循及訥

伏見武康令賀循德量遠茂才鑒清遠服膺道素風操

凝峻歷試二城刑政肅穆前蒸陽令郭訥風度簡曠器

識朗拔通濟敏悟才足幹事循守下縣編名凡悴訥歸家巷棲遲有年皆出自新邦朝無知己居在遐外志不自營年時倏忽而邈無階緒實州黨愚智所為恨恨臣等伏思臺郎所以使州州有人非徒以均分顯路惠及外州而已誠以庶士殊風四方異俗壅隔之害遠國益甚至於荆揚二州戶各數十萬今揚州無郎而荊州江南乃無一人為京城職者誠非聖朝待四方之本心至於才望資品循可尚書郎訥可太子洗馬舍人此乃衆

望所積非但企及清塗苟充方選也謹條資品乞蒙簡

察

晉書 恪居虞書作
居在恨恨作恨然

與趙王倫薦戴淵疏

淵字若思廣陵人少游俠
遇機赴洛船裝掠之指麾

同旅皆得其宜機知非常人遙謂曰卿才器
如此乃復作劫邪淵感悟因流涕投劍就之
機與定交焉舉孝廉入洛機時為倫相國參
軍薦于倫辟除沁水令不就後仕驃騎將軍
為王敦
所害

蓋聞繁弱登御然後高墉之功顯孤竹在肆然後降神
之曲成是以高世之主必假遠邇之器蘊匱之才思託

大音之和伏見處士廣陵戴若思年三十清沖履道德
量允塞思理足以研幽才鑒足以辯物安窮樂志無風
塵之慕砥節立行有井渫之潔誠東南之遺寶宰朝之
奇璞也若得託蹟康衢則能結軌驥驟曜質廊廟必能
垂光璣璠矣惟明公垂神採察不使忠允之言以人而
廢

晉書

同前

虞預
晉書

伏見處士戴淵砥節立行有井渫之潔安窮樂志無風

塵之慕誠東南之遺寶朝廷之貴璞也若得寄跡康衢
必能結軌驥騄耀質廊廟必能垂光瑜璫夫枯岸之民
果於輸珠潤山之客烈於貢玉蓋明暗呈形則庸識所
甄也

薦張暢表

伏見司徒下諫議大夫張暢除當為豫章內史丞暢才
思清敏志節貞勵秉心立操蚤有名譽其年時儁比多
歷郡守惟暢陵遲未齒而佐下蕃遂蹈碎濁於暢名實

損愚以為宜解舉試以近縣

北堂書抄

惠帝詔報

暢既為是人所稱便差代之

謝平原內史表

趙王倫輔政引機為相國參軍倫將篡以為中書郎及倫誅齊

王同以機職在中書九錫文及禪詔疑機與焉收付廷尉賴成都王穎吳王晏救免同敗

穎表為平原內史

陪臣陸機言今月九日魏郡太守遣兼丞張含齎板詔書印綬假臣為平原內史拜受祇竦不知所裁臣本出

自敵國世無先臣宣力之效才非丘園耿介之秀皇澤
廣被惠濟無遠擢自羣萃累蒙榮進入朝九載歷官有
六身登三閤宦成兩宮服冕乘軒仰齒貴游振景拔迹
顧邈同列施重山岳義足灰沒遭國顛沛無節可紀雖
蒙曠盪臣獨何顏俛首頓膝憂愧若厲而橫為故齊王
罔所見枉陷誣臣與衆人共作禪文幽執囹圄當為誅
始臣之微誠不負天地倉卒之際慮有逼迫乃與弟雲
及散騎侍郎袁瑜中書侍郎馮熊尚書右丞崔基廷尉

正顧榮汝陰太守曹武思所以獲免陰蒙避迴崎嶇自
列片言隻字不關其間事蹤筆跡皆可推校而一朝翻
然更以為罪最爾之生尚不足吝區區本懷實有可悲
畏逼天威即罪惟謹鉗口結舌不敢上訴所天莫大之
慶日經聖聽肝血之誠終不一聞所以臨難慷慨而不
能不恨恨者惟此而已重蒙陛下愷悌之宥迴霜收電
使不隕越復得扶老攜幼生出獄戶懷金拖紫退就散
輩感恩惟咎五情震悼跼天躋地若無所容不悟日月

之明遂垂曲照雲雨之澤播及朽瘁忘臣弱才身無足
采哀臣零落罪有可察苟削丹書得夷平民則塵洗天
波謗絕衆口臣之始望尚未至是猥辱大命顯授符虎
使春枯之條更與秋蘭垂芳陸沉之羽復與翔鴻撫翼
雖安國免徒起紆青組張敞亡命坐致朱軒方臣所荷
未足為泰豈臣蒙垢含各所宜忝竊非臣毀宗夷族所
能上報喜懼參并悲慙哽結拘守常憲當便道之官不
得束身奔走稽顙城闕瞻係天衢馳心輦轂臣不勝屏

營延仰謹拜表以聞

初學記載謝表云臣以職在中書制命所出而臣本以筆札見知慮

逼迫不獲已乃詐發內妹喪出就弟雲哭泣受弔片言隻字不闕其間

詣吳王晏表

臣本吳人靖居海隅朝廷欲抽引遠人綏慰遐外故太

傅所辟殿下東到淮南發詔以臣為郎中令

太平御覽書抄載

詣吳王表相國參軍率取臺郎臣獨以高陽見取王隱晉書載與吳王表禪文本草見在中書一字一蹟自

可分別

至洛與成都王穎牋

太安初穎起兵討長沙王又表請誅后父羊元之左

將軍皇甫嵩等徵入使就第以機為前鋒都督前將軍假節與穎戣及戰於鹿苑機軍敗績穎收機斬之夷其三族

王室多故禍難荐有羊元之來寵凶豎專記朝政姦臣賊子是為比周皇甫嵩同惡相求共為亂階至今天子飄飄甚於贅旒伏惟明公匡濟之舉義命方宣元戎既啟風威電赫機以篤闇文武寡施猥蒙橫授委在外閫

輒承嚴教董率諸軍惟力是視

陸士衡集
山南城人

惠皇太后父歷
羊元之泰

尚書右僕射加侍中成都王攻長沙王以討元之為名之憂懼卒廢后為庶人

選注機與成都王戡慶雲

金史卷之八
惠露止
於落葉

與長沙夫人書

士璜亡恨一襦少便以機新襦衣與之

太平御覽與長沙顏母書痛

心拔惱有如孔懷
乃言云云心既痛矣即為甚思何故言有祖弟士璜死

兄弟為孔懷
於義通乎

與弟雲書

左思作三都賦構思十年初機入洛亦欲為此聞思作之撫掌而笑與雲

書及思賦出機絕歎伏
以為不能加遂輟筆焉

此間有一傖父欲作三都賦須其成以覆酒甕耳

世說
晉

陽秋云吳人以中州人為僞
酒甕一作酒甌一作醬甕

與弟雲書

仁壽殿前有大方銅鏡高五尺餘廣三尺二寸立著庭
中向之便寫人形體了了亦怪也

又

天淵池南角有果各作一株無處不有縱橫成行一果

之間輒作一堂

又云天淵池養
山雞甚可嬉

又

張騫為漢使外國十八年得塗林安石榴也

此藝文類聚齊民要

術載陸機與弟雲書張騫使外國十八年得苜蓿種歸

又

監徒武庫建始殿諸房中見有兩足猴真怪物也

並太平御

覽又云聽訟觀東作百丈許廊屋水經注又云門有三層高百尺言洛陽大夏門也

演連珠五十首

載文選

臣聞日薄星迴穹天所以紀物山盈川沖后土所以播氣五行錯而致用四時違而成歲是以百官恪居以赴

八音之離明君執契以要克諧之會

臣聞任重於力才盡則困用廣其器應博則凶是以物
勝權而衡殆形過鏡則照窮故明主程才以效業貞臣
底力而辭豐

臣聞髦俊之才世所希乏丘園之秀因時則揚是以大
人基命不擢才於后土明主聿興不降佐於昊蒼

臣聞世之所遺未為非寶主之所珍不必適治是以俊
乂之數希蒙翹車之招金碧之巖必辱鳳舉之使

臣聞祿施於寵非隆家之舉官私於親非興邦之選是以三卿世及東國多衰弊之政五侯並軌西京有陵夷之運

臣聞靈輝朝覲稱物納照時風夕灑程形賦音是以至道之形萬類取足於世大化既洽百姓無匱於心

臣聞頓網探淵不能招龍振網羅雲不必招鳳是以巢箕之叟不盼丘園之幣洗渭之民不發傅巖之夢

臣聞鑑之積也無厚而照有重淵之深目之察也有畔

而眡周天壤之際何則應事以精不以形造物以神不以器是以萬邦凱樂非悅鐘鼓之娛天下歸仁非感玉帛之惠

臣聞積實雖微必動於物崇虛雖廣不能移心是以都人冶容不悅西施之影乘馬班如不輟太山之陰

臣聞應物有方居難則易藏器在身所乏者時是以充堂之芳非幽蘭所難繞梁之音實縈絃所思

臣聞智周通塞不為時窮才經夷險不為世屈是以凌

颺之羽不求反風曜夜之目不思倒日

臣聞忠臣率志不謀其報貞士發憤期在明賢是以柳莊黜擯非貪瓜衍之賞禽息碎首豈要先茅之田

臣聞利眼臨雲不能垂照朗璞蒙垢不能吐輝是以明哲之君時有蔽壅之累俊乂之臣屢抱後時之悲

臣聞郁烈之芳出於委灰繁會之音生於絕絃是以貞女要名於沒世烈士赴節於當年

臣聞良宰謀朝不必借威貞臣衛主修身則足是以三

晉之強屈於齊堂之俎千乘之勢弱於陽門之哭

臣聞赴曲之音洪細入韻蹈節之容俯仰依詠是以言
苟適事精粗可施士苟適道修短可命

臣聞因雲灑潤則芬澤易流乘風載響則音徽自遠是
以德教俟物而濟榮名緣時而顯

臣聞覽影偶質不能解獨指跡慕遠無救於遲是以
循虛器者非應物之具玩空言者非致治之機

臣聞鑽燧吐火以續暘谷之晷揮翮生風而繼飛廉之

功是以物有微而毗著事有瑣而助洪

臣聞春風朝煦蕭艾蒙其溫秋霜宵墜芝蕙被其涼是以威以齊物為肅德以普濟為弘

臣聞性之所期貴賤同量理之所極卑高一歸是以准月稟水不能加涼晞日引火不必增輝

臣聞巧盡於器習數則貫道繫於神人亡則滅是以輪匠肆目不乏奚仲之妙瞽叟清耳而無伶倫之察

臣聞絕節高唱非凡耳所悲肆義芳訊非庸聽所善是

以南荆有寡和之歌東野有不釋之辯

臣聞尋煙染芬薰息猶芳徵音錄響操終則絕何則垂
於世者可繼止乎身者難結是以玄晏之風恒存動神
之化已滅

臣聞託閭藏形不為巧密倚智隱情不足自匿是以
重光發藻尋虛捕景大人貞觀探心昭忒

臣聞披雲看霄則天文清澄風觀水則川流平是以四
族放而唐幼二臣誅而楚寧

臣聞音以比耳為美色以悅目為歡是以衆聽所傾非假百里之操萬夫婉孌非俟西子之顏故聖人隨世以擢佐明主因時而命官

臣聞出乎身者非假物所隆牽乎時者非克己所勗是利盡萬物不能獻童昏之心德表生民不能救棲遑之辱

臣聞動循定檢天有可察應無常節身或難照是以望景揆日盈數可期撫臆論心有時而謬

臣聞傾耳求音眡優聽苦澄心徇物形逸神勞是以天
殊其數雖同方不能分其憾理塞其通則並質不能共
其休

臣聞遯世之士非受匏瓜之性幽居之女非無懷春之
情是以名勝欲故偶影之操矜窮愈達故凌霄之節
厲

臣聞聽極於音不慕鈞天之樂身足於蔭無假垂天
之雲是以蒲密之黎遺時雍之世豐沛之士忘桓撥之

君

臣聞飛轡西頓則離朱與矇眴收察懸景東秀則夜
光與珷玞匿耀是以才換世則俱困功偶時而並劬

臣聞示應於近遠有可察託驗於顯微或可包是以
寸管下俵天地不能以氣欺尺表逆立日月不能以形

逃

臣聞絃有常音故曲終則改鏡無畜影故觸形則照
是以虛已應物必究千變之容挾情適事不觀萬殊

之妙

臣聞祝敎希聲以諧金石之和
鞀鼓踈擊以節繁絃之
契是以經治必宣其通圖物恒審其會

臣聞目無常音之察耳無照景之神
故在乎我者不誅
之於已存乎物者不求備於人

臣聞放身而居體逸則安肆口而食屬厭則充
是以王
鮪登俎不假吞波之魚
蘭膏停室不思銜燭之龍

臣聞衝波安流則龍舟不能以漂震風洞發則夏屋有

時而傾何則牽乎動則靜凝係乎靜則動貞是以淫風大行貞女蒙治容之誨淳化殷流盜跖挾曾史之情

臣聞達之所服貴有或遺窮之所接賤而必尋是以江漢之君悲其墜屨少原之婦哭其亡簪

臣聞觸非其類雖疾弗應感以其方雖微則順是以商飈漂山不興盈尺之雲谷風乘條必降彌天之潤故閭於治者唱繁而和寡審乎物者力約而功峻

臣聞煙出於火非火之和情生於性非性之適故火壯則煙微性充則情約是以殷墟有感物之悲周京無佇立之跡

臣聞適物之技俯仰異用應事之器通塞異任是以鳥栖雲而繳飛魚藏淵而網沉賁鼓密而含響朗笛疎而吐音

臣聞理之所守勢所常奪道之所閉權所必開是以生重於利故據圖無揮劍之痛義重於身故臨川有投

跡之哀

臣聞圖形於影未盡纖麗之容察火於灰不覩洪赫之烈是以問道存乎其人觀物必造其質

臣聞通於變者用約而利博明其要者器淺而應玄是以天地之蹟該於六位萬殊之曲窮於五絃

臣聞情見於物雖遠猶踈神藏於形雖近則密是以儀天少晷而修短可量臨淵揆水而淺深難察

臣聞虐暑薰天不減堅氷之寒涸陰凝地無累陵火之

熱是以吞縱之強不能反蹈海之志漂櫓之威不能降
西山之節

臣聞理之所開力所常達數之所塞威有必窮是以烈
火流金不能焚景沉寒凝海不能結風

臣聞足於性者天損不能入貞於期者時累不能淫是
以迅風陵雨不謬晨禽之察勁陰殺節不凋寒木之
心

七徵



玄虛子耽性冲素雍容玄泊棄時俗而弗徇甘漁釣於
一壑乃有通微大夫怨皇居之失寶傷鴻誓之後聞策
玄黃於榛險憑穴巖而放言通微大夫曰奇膳玉食窮
滋致豐簡犧羽族考牲毛宗俯出沉鮪仰落歸鴻剖柔
胎於孕豹宰潛肝乎泰龍拾朝陽之遺卵納丹穴之飛
凰神宰奇稔嘉禾之穗含滋發馨素穎玉銳灼若皓雪
之類玄雲皎若明珠之積緇匱素蟻踊而澆滷滋芬溢
而相徽味雖濃而弗爽氣既惠而復奇介景福於眉壽

裕溫克乎齊聖子能饗之乎通微大夫曰豐居華殿奇
構磊落萬宇雲覆千楹林錯仰綏瑰木俯積琬石數延
袤之廣廡矯凌霄之高閣秀清暉乎雲表騰藻陰之奕
奕珍觀清榭岳立連行雲階飛陞仰陟穹蒼聳浮柱而
虬立施飛檐以龍翔回房旋室綴珠襲玉圖畫神仙延
祐承福懸闥高達長廊迴屬於是登漸臺理俊音鏡玄
沚望長林逐狡獸弋輕禽覽壯藝以悅觀聆和樂而怡
心子能居之乎通微大夫曰金石諧而齊響埴篲協而和

鳴於是才人進羽籥玄弁被藻襲俯紫領以鴻歸仰矯
首而鶴立激長歌而丹唇發鏗鏘乎柔木合清商以絕
節揮流徵而赴曲奏商荆之高歎詠易水之清角爾乃
觀蛾眉之羣麗容既都而又閒矯纖腰以逐節頓皓足
於鼓盤舒妍暉以妖韶若陵危之未安通微大夫曰蓋
聞沫北有采唐之思淇上有送予之歎關雎以寤寐為
戚溱洧以謔浪為歡若夫妖嬈豔女蒐羣擢俊穆藻儀
於今表茂當年之柔嫚罄妍規之約綽體每變而增閒

秀紅蕤其愉愉若餘穎之可食若夫靈晷潛祖顏退羽
觴升清琴厲因清明以宣誠流徽睇而授愛纖手揮而
鳴佩鏗華衿被則芳塵萃子其納之乎通微大夫曰塗
有殊而一致業有殊而名約各因姿以效績期寄響於
天人也孰與顯竒蹤於萬邦撫六轡而高遊瞰八字以
攄眇齊清風乎諸侯言成否泰氣作溫涼彌侵略於強
暴綜墜紀乎危邦子豈不顧斯之雍容乎通微大夫曰
明主應期撫民以德配仁風於黃唐齊威靈乎宸極彛

倫幸序庶績咸乂盪流風於雍俗給天民乎齊泰是以
玄靈感而表應嘉神繁而畢覲舞唐庭之來儀鳴岐陽
之鷩鷩應天監之休命荷神聽之介福然聖主達持盈
之寶術寤經國之在賢各畢榮於分局期贊化於大鈞
吾子豈不欲縻好爵於天宇顯劉業乎帝臣歟玄虛子
作而言曰甚哉鄙人之惑也猶窮繩自逸於井幹憑河

盜本於黃川欽至論敷敝衽謹聞命於王孫

書鈔載
七微云

旨甘調以充饑芬馨發而協氣又七美云湘陰有耐
其色澄清秋醪春醞酒惟九成又七導云操紫間之

神機審必中而後射
長角三倡武士旂布

豪士賦叙

齊王冏既誅趙王倫矜功自伐受爵不讓機作豪士賦以刺焉冏卒以敗

序載文
選晉書

夫立德之基有常而建功之路不一何則循心以為量
者存乎我因物以成務者繫乎彼存夫我者隆殺止乎
其域繫乎物者豐約唯所遭遇落葉俟微風以隕而風
之力蓋寡孟嘗遭雍門以泣而琴之感以末何者欲隕
之葉無所假烈風將墜之泣不足繁哀響也是故苟時

啟於天理盡於民庸夫可以濟聖賢之功斗筭可以定
烈士之業言遇時也故曰才不半古而功已倍之蓋得
之於時勢也歷觀古今徼一時之功而居伊周之位者
有矣夫我之自我智士猶嬰其累物之相物昆蟲皆有
此情夫以自我之量而挾非常之勲神器暉其顧盼萬
物隨其俯仰心玩居常之安耳飽從諛之說豈識乎功
在身外任出才表者哉且好榮惡辱有生之所大期忌
盈害上鬼神猶且不免人主操其常柄天下服其大節

故曰天可讐乎而時有衽服荷戟立於廟門之下援旗
擔衆奮於阡陌之上況乎代主制命自下裁物者哉廣
樹恩不足以敵怨勤興利不足以補害故曰代大匠斲
者必傷其手且夫政由竄氏忠臣所為慷慨祭則寡人
人主所不久堪是以君奭鞅鞅不悅公旦之舉高平師
師側目博陸之勢而成王不遣嫌吝於懷宣帝若負芒
刺於背非其然者與嗟乎光于四表德莫富焉王曰叔
父親莫昵焉登帝天位功莫厚焉守節沒齒忠莫至焉

而傾側顛沛僅而自全則伊生抱明允以嬰戮文子懷忠敬而齒劍固其所也因斯以言夫以篤聖穆親如彼之懿大德至忠如此之盛尚不能取信於人主之懷止謗於衆多之口過此以往惡覩其可安危之理斷可識矣又況乎饗大名以冒道家之忌運短才而易聖指所難者哉身危由於勢過而不知去勢以求安禍積起於寵盛而不知辭寵以招福見百姓之謀已則申宮警守以崇不畜之威懼萬民之不服則嚴刑峻制以賈傷心

之怨然後威窮乎震主而怨行乎上下衆心日陟危機
將發而方偃仰瞪眄謂足以夸世笑古人之未工忘已
事之已拙知曩勲之可矜暗成敗之有會是以事窮運
盡必於顛仆風起塵合而禍至常酷也聖人忌功名之
過已惡寵祿之踰量蓋為此也夫惡欲之大端賢愚所
共有而游子徇高位於生前志士思垂名於身後受生
之分唯此而已夫蓋世之業名莫大焉震主之勢位莫
盛焉率意無違欲莫順焉借使伊人頗覽天道知盡不

可益盈難久持超然自引高揖而退則巍巍之盛仰邈
前賢洋洋之風俯冠來籍而大欲不乏於身至樂無愆
乎舊節彌效而德彌廣身愈逸而名愈劬此之不為彼
之必昧然後河海之跡堙為窮流一簣之釁積成山岳
名編凶頑之條身厭荼毒之痛豈不謬哉故聊賦焉庶
使百世少有寤云

風五臣作飆何者晉書作
何哉勢作世眠五臣作暍

文賦序

余每觀才士之作竊有以得其用心夫其放言遣辭良多

變矣妍蚩好惡可得而言每自屬文尤見其情恒患意
不稱物文不逮意蓋非知之難能之難也故作文賦以
述先士之盛藻因論作文之利害所由他日殆可謂曲
盡其妙至於操斧伐柯雖取則不遠若夫隨手之變良
難以辭逮蓋所能言者具於此云爾

遂志賦序

昔崔篆作詩以明道述志而馮衍又作顯志賦班固作
幽通賦皆相依倣焉張衡思立蔡邕立表張叔哀系此

前世之可得言者也崔氏簡而有情顯志壯而汎濫哀
系俗而時靡玄表雅而微素思玄精練而和惠欲麗前
人而優游清典漏幽通矣班生彬彬切而不絃哀而不
怨矣崔蔡冲虛溫敏雅人之屬也馮衍抑揚頓挫怨之
徒也豈亦窮達異事而聲為情變乎余備託作者之末
聊復用心焉

懷土賦序

余去家漸久懷土彌篤方思之殷何物不感曲街委巷

罔不興詠水泉草木咸足悲焉故述斯賦

思歸賦序

余以元康六年冬取急歸而王師外征職典中兵與聞
軍政懼兵革未息宿願有違懷歸之思憤而成篇

愍思賦序

予屢抱孔懷之痛而奄復喪同生妙銜恤哀傷一載之
間而喪制便過故作此賦以紓慘惻之感

應嘉賦序

友人有作嘉遁賦與余者作賦應之號曰應嘉云

歎逝賦序

昔每聞長老追計平生同時親故或凋落已盡或僅有存者余年方四十而懿親戚屬已多存寡昵交密友亦不半在或所曾共遊一途同宴一室十年之內索然已盡以是思哀哀可知矣

大暮賦序

夫生死是得失之大者故樂莫甚焉哀莫深焉使死而

有知乎安知其不如生如遂無知耶又何生之足戀故
極言其哀而終之以達庶以開夫近俗云

桑賦序

皇太子便坐蓋本將軍直廬也初世祖武皇帝為中壘
將軍植桑一株世更三代年漸三紀綠葉興而盈尺崇
條蔓而增尋扶疎豐衍抑有瑰異焉

三代一作二代

鞠歌行序

序曰按漢宮閭有含章鞠室靈芝鞠室後漢馬防第宅

卜臨道連閣通池鞠城彌於街路鞠歌將謂此也又東
阿王詩連騎擊壤或謂蹴鞠乎三言七言雖奇寶名
器不遇知己終不見重願逢知己以託意焉

答賈謐詩序

余昔為太子洗馬魯公賈長淵以散騎常侍侍東宮積
年余出補吳王郎中令元康六年入為尚書郎魯公贈
詩一篇作詩答之云爾

贈弟士龍詩序

余弱年夙孤與弟士龍銜卹喪庭續會逼王命墨經即
戎時並縈髮悼心告別漸歷八載家邦顛覆凡厥同生
彫落殆半收迹之日感物興哀而龍又先在四時迫當
祖載二昆不容逍遙銜痛東徂遺情西慕故作是詩以
寄其哀苦焉

辨亡論上篇

機年二十吳滅閉門勤學積有十年乃論孫氏權所以得皓所以亡

又述其祖父功業作辨亡論二篇

載文選晉書

昔漢氏失御姦臣竊命禍基京畿毒徧宇內皇綱弛紊

王室遂卑於是羣雄蜂駭義兵四合吳武烈皇帝慷慨
下國電發荆南權畧紛紜忠勇伯世威稜則夷羿震盪
兵交則醜虜授馘遂掃清宗祊蒸禋皇祖於時雲興之
將帶州飊起之師跨邑哮闐之羣風驅熊羆之衆霧集
雖兵以義合同盟戮力然皆苞藏禍心阻兵怙亂或師
無謀律喪威稔寇忠規武節未見如此其著者也武烈
既沒長沙桓王逸才命世弱冠秀發招攬遺老與之述
業神兵東驅奮寡犯衆攻無堅城之將戰無交鋒之虜

誅叛柔服而江外底定飭法修師則威德翕赫賓禮名
賢而張昭為之雄交御豪俊而周瑜為之傑彼二君子
皆弘敏而多奇雅達而聰哲故同方者以類附等契者
以氣集而江東蓋多士矣將北伐諸華誅鉏耆紀旋皇
輿於夷庚反帝座乎紫闥挾天子以令諸侯清天步
而歸舊物戎車既次羣雄側目大業未就中世而殞用
集我大皇帝以奇蹤襲於逸軌睿心因於令圖從政咨
於故實播憲稽乎遺風而加之以篤固申之以節儉壽

咨俊茂好謀善斷東帛旅於邱園旌命交於塗巷故
豪彥尋聲而響臻志士希光而景驚異人輻輳猛士
如林於是張昭為師傅周瑜陸公魯肅呂蒙之儔入為
腹心出作股肱甘寧凌統程普賀齊朱桓朱然之徒奮
其威韓當潘璋黃蓋蔣欽周泰之屬宣其力風雅則諸
葛瑾張承步騭以名聲光國政事則顧雍潘濬呂範呂
岱以器任幹職奇偉則虞翻陸績張溫張惇以諷議舉
正奉使則趙咨沈珩以敏達延譽術數則吳範趙達以

機祥協德董襲陳武殺身以衛主駱統劉基強諫以補
過謀無遺請舉不失策故遂割據山川跨制荆吳而與
天下爭衡矣魏氏常藉戰勝之威率百萬之師浮鄧塞
之舟下漢陰之衆羽楫萬計龍躍順流銳騎千旅虎步
原隰謨臣盈室武將連衡喟然有吞江潁之志一宇宙
之氣而周瑜驅我偏師黜之赤壁喪旗亂轍僅而獲免
收蹟遠遁漢王亦憑帝王之號帥巴漢之民乘危騁變
結壘千里志報關羽之敗圖收湘西之地而陸公亦挫

之西陵覆師敗績困而後濟絕命永安續以濡須之寇
臨川摧銳蓬籠之戰子輪不反由是二邦之將喪氣挫
鋒勢劬財匱而吳莞然坐乘其弊故魏人請好漢氏乞
盟遂躋天號鼎峙而立西屠庸益之郊北裂淮漢之涘
東包百越之地南括羣蠻之表於是講八代之禮蒐三
王之樂告類上帝拱揖羣后虎臣毅卒循江而守長棘
勁鍔望颿而奮庶尹盡規於上四民展業於下化協殊
裔風衍遐圻乃俾一介行人撫巡外域巨象逸駿擾於

外閑明珠瑋寶耀於內府珍瑰重跡而至奇玩應響而
赴輜軒騁於南荒衝輶息於朔野齊民免干戈之患戎
馬無晨服之虞而帝業固矣大皇既沒幼主蒞朝姦回
肆虐景皇聿興虔修遺憲政無大闕守文之良主也降
及歸命之初典刑未滅故老猶存大司馬陸公以文武
熙朝左丞相陸凱以謇諤盡規而施績范慎以威重顯
丁奉鍾離斐以武毅稱孟宗丁固之徒為公卿樓玄賀
邵之屬掌機事元首雖病股肱猶存爰及末葉羣公既

喪然後黔首有瓦解之患。皇家有土崩之釁。歷命應化而徵。王師躡運而發。卒散于陣。民犇于邑。城池無藩籬之固。山川無溝阜之勢。非有公輸雲梯之械。智伯灌激之害。楚子築室之圍。燕人濟西之隊。軍未浹辰而社稷夷矣。雖忠臣孤憤烈士死節將奚救哉。夫曹劉之將非一世所選。向時之師無曩日之衆。戰守之道抑有前符險阻之利。俄然未改而成敗。貿理古今詭趣。何哉。彼此之化殊授任之才異也。

辨亡論下篇

昔三方之王也魏人據中夏漢氏有岷益吳制荆揚而
奄有交廣曹氏雖功濟諸華虐亦深矣其民怨矣劉公
因險以飾智功已薄矣其俗陋矣夫吳桓王基之以武
太祖成之以德聰明叡達懿度弘遠矣其求賢如不及
恤民如稚子接士盡盛德之容親仁罄丹府之愛拔呂
蒙於戎行識潘濬於係虜推誠信士不恤人之我欺量
能授器不患權之我偏執鞭鞠躬以重陸公之威悉委

武衛以濟周瑜之師卑宮非食豐功臣之賞披懷虛已
納謨士之算故魯肅一面而自托士變蒙險而效命高
張公之德而省游田之娛賢諸葛之言而割情欲之歡
感陸公之規而除刑法之煩竒劉基之議而作三爵之
誓屏氣跼蹐以伺子明之疾分滋損甘以育凌統之孤
登壇慷慨歸魯子之功削投惡言信子瑜之節是以忠
臣競盡其謀志士咸得肆力洪規遠畧固不厭夫區區
者也故百官苟合庶務未遑初都建業羣臣請備禮秩

天子辭而不許曰天下其謂朕何宮室輿服蓋慊如也
爰及中葉天人之分既定百度之闕粗修雖醲化懿綱
未齒乎上代抑其體國經邦之具亦足以為政矣地方
幾萬里帶甲將百萬其野沃其兵練其器利其財豐東
負滄海西阻險塞長江制其區宇峻山帶其封域國家
之利未巨有弘於茲者矣借使中才守之以道善人御
之有術敦率遺典勤民謹政循定策守常險則可以長
世永年未有危亡之患也或曰吳蜀唇齒之國蜀滅則

吳亡理則然矣夫蜀蓋藩援之與國而非吳人之存亡也何則其郊境之接重山積險陸無長轂之徑川阨流迅水有驚波之艱雖有銳師百萬啟行不過千夫舳艫千里前驅不過百艦故劉氏之伐陸公喻之長蛇其勢然也昔蜀之初亡朝臣異謀或欲積石以險其流或欲機械以御其變天子總羣議而諮之大司馬陸公公以四瀆天地之所以節宣其氣固無可遏之理而機械則彼我之所共彼若棄長技以就所屈即荆揚而爭舟楫

之用是天贊我也將謹守峽口以待禽耳逮步聞之亂
憑寶城以延強寇重資幣以誘羣蠻于時大邦之衆雲
翔電發懸於江介築壘遵渚襟帶要害以止吳人之西
而巴漢舟師沿江東下陸公以偏師三萬北據東坑深
溝高壘案甲養威反虜跼跡待戮而不敢北窺生路強
寇敗績宵遁喪師大半分命銳師五千西禦水軍東西
同捷獻俘萬計信哉賢人之謀豈欺我哉自是烽燧罕
警封域寡虞陸公沒而潛謀兆吳釁深而六師駭夫太

康之後衆未盛乎曩日之師廣州之亂禍有愈乎向時之難而邦家顛覆宗廟為墟嗚呼人之云亡邦國殄瘁不其然歟易曰湯武革命順乎天玄曰亂不極則治不形言帝王之因天時也古人有言曰天時不如地利易曰王侯設險以守其國言為國之恃險也又曰地利不如人和在德不在險言守險之由人也吳之興也參而由焉孫卿所謂合其參者也及其亡也恃險而已又孫卿所謂捨其參者也夫四州之萌非無衆也大江之南

非乏俊也山川之險易守也勁利之器易用也先政之策易循也功不興而禍遘者何哉所以用之者失也是故先王達經國之長規審存亡之至數謙已以安百姓敦惠以致人和寬沖以誘俊乂之謀慈和以結士民之愛是以其安也則黎元與之同慶及其危也則兆庶與之共患安與衆同慶則其危不可得也危與下共患則其難不足恤也夫然故能保其社稷而固其土宇麥秀無悲殷之思黍離無愍周之感矣

烽一作峰
堯作堯
志作耀作輝
弘作

金史卷之八
深效作致謨作謀兵
練作民練萌作氓

卷十五

五等諸侯論

機以聖王經國義在封建因採其
遠指著五等論
載文選晉書

夫體國營治先王所慎創制垂基思隆後葉然而經略
不同長世異術五等之制始於黃唐郡縣之治創於秦
漢得失成敗備在典謨是以其詳可得而言夫先王知
帝業至重天下至曠曠不可以偏制重不可以獨任任
重必於借力制曠終乎因人故設官分職所以輕其任
也並建五長所以弘其制也於是乎立其封疆之典財

其親疎之宜使萬國相維以成磐石之固宗庶雜居而定維城之業又有以見綏世之長御識人情之大方知其為人不如厚己利物不如圖身安上在於悅下為己在乎利人故易曰悅以使民民忘其勞孫卿曰不利而利之不如利而後利之之利也是以分天下以厚樂則已得與之同憂饗天下以豐利而我得與之共害利博而恩篤樂遠則憂深故諸侯享食土之實萬國受世及之祚矣夫然則南面之君各務其政九服之民知有定

主上之子愛于是乎生下之體信於是乎結世平足以敦風道衰足以禦暴故強毅之國不能擅一時之勢雄俊之士無所寄霸王之志然後國安由萬邦之思治主尊賴羣后之圖身譬猶衆目營方則天網自昶四體辭難而心膂獲又蓋三代所以直道四王所以垂業也夫盛衰隆敝理所固有教之廢興繫乎其人愿法期於必諒明道有時而闇故世及之制敝於強禦厚下之典漏於末折侵弱之釁遘自三季陵夷之禍終于七雄昔者

成湯親照夏后之鑒公旦目涉商人之戒文質相濟損益有物故五等之禮不革於時封畛之制有隆焉爾者豈玩二王之禍而闇經世之算乎固知百世非可懸御善制不能無敝而侵弱之辱愈於殄祀土崩之困痛於陵夷也是以經始權其多福慮終取其少禍非謂侯伯無可亂之符郡縣非致治之具也故國憂賴其釋位主弱憑其翼戴及承微積敝王室遂卑猶保名位祚垂後嗣皇統幽而不輟神器否而必存者豈非事勢使之然

歟降及亡秦棄道任術懲周之失自矜其得尋斧始於
所庇制國昧於弱下國慶獨饗其利主憂莫與其害雖
速亡趣亂不必一道顛沛之釁實由孤立是蓋思五等
之小怨忘經國之大德知陵夷之可患闇土崩之為痛
也周之不競有自來矣國乏令主十有餘世然片言勤王
諸侯必應一朝振矜遠國先叛故強晉收其請隧之圖
暴楚頓其觀鼎之志豈劉項之能關關勝廣之敢號澤
哉借使秦人因循其制雖則無道有與共弊覆滅之禍

豈在曩日漢矯秦枉大啓侯王境土踰溢不遵舊典故
賈生憂其危晁錯痛其亂是以諸侯阻其國家之富憑
其士民之力勢足者反疾土狹者逆遲六臣犯其弱網
七子衝其漏網皇祖夷於黔徒西京病於東帝是蓋過
正之菑而非建侯之累也然呂氏之難朝士外顧宋昌
策漢必稱諸侯逮至中葉忌其失節割削宗子有名無
實天下曠然復襲亡秦之軌矣是以五侯作威不忌萬
邦新都襲漢易於拾遺也光武中興篡隆皇統而猶遵

覆車之遺轍養喪家之宿疾僅及數世姦宄充斥卒有
強臣專朝則天下風靡一夫縱橫則城池自夷豈不危
哉在周之衰難興王室放命者七臣干位者三子嗣王
委其九鼎凶族據其天邑征輦震於闔宇鋒鏑流于絳
闕然禍止畿甸害不覃及天下晏然以治待亂是以宣
王興於共和襄惠振於晉鄭豈若二漢階闥輒擾而四
海已沸孽臣朝入而九服夕亂哉遠惟王莽篡逆之
事近覽董卓擅權之際億兆悼心愚智同痛然周以

之存漢以之亡夫何故哉豈世之曩時之臣士無匡合之志歟蓋遠績屈於時異雄心挫於卑勢爾故烈士扼腕終委寇讐之手中人變節以助虐國之桀雖復時有鳩合同志以謀王室然上非與主下皆市人師旅無先定之班君臣無相保之志是以義兵雲合無救劫弑之禍民望未改而已見大漢之滅矣或以諸侯世位不必常全昏主暴君有時比跡故五等所以多亂今之牧守皆以官方庸能雖或失之其得固多故郡縣易以為治

夫德之休明黜陟日用長率連屬咸述其職而淫昏之君無所容過何則其不治哉故先代有以之興矣苟或衰陵百度自悖鬻官之吏以貨準才則貪殘之萌皆如羣后也安在其不亂哉故後王有以之廢矣且要而言之五等之君為已思治郡縣之長為利圖物何以徵之蓋企及進取仕子之常志修已安民良士之所希及夫進取之情銳而安民之譽遲是故侵百姓以利已者在位所不憚捐實事以養名者官長所夙夜也君無卒歲

之圖臣挾一時之志五等則不然知國為己土衆皆我
民民安已受其利國傷家嬰其病故前人欲以垂後後
嗣思其堂構為上無苟且之心羣下知膠固之義使其
並賢居治則功有厚薄兩愚處亂則過有深淺然則探
八代之制幾可以一理貫秦漢之典殆可以一言蔽矣

營治晉書作經野先王作王者曠作廣在作存同憂作
同愛世及作傳世體信作禮信愿作原經國作萬國弊
作亡邦作國弑作殺夜作慕治並作政致治作興化以
治待亂作以安待危民並作人一作庶作衆 宣王五
臣作厲宣
萌作氓

漢高祖功臣頌

載文選

相國鄼文終侯沛蕭何相國平陽懿侯沛曹參太子少
傅留文成侯韓張良丞相曲逆獻侯陽武陳平楚王淮
陰韓信梁王昌彭越淮南王六黥布趙景王大梁張耳
韓王韓信燕王豐盧綰長沙文王吳芮荆王沛劉賈太
傅安國懿侯王陵左丞相絳武侯沛周勃相國舞陽侯
沛樊噲右丞相曲周景侯高陽酈商太僕汝陰文侯沛
夏侯嬰丞相潁陰懿侯睢陽灌嬰代丞相陽陵景侯魏

傳寬車騎將軍信武肅侯靳歙大行廣野君高陽酈食
其中郎建信侯齊劉敬大中大夫楚陸賈太子太傅稷
嗣君薛叔孫通魏無知護軍中尉隨何新城三老董公
轅生將軍紀信御史大夫沛周苛平國君侯公右三十
一人與定天下安社稷者也頌曰

芒芒宇宙上塲下黷波振四海塵飛五岳九服徘徊三
靈改卜赫矣高祖肇載天祿沉跡中鄉飛名帝錄慶雲
應輝皇階授木龍興泗濱虎嘯豐谷彤雲晝聚素靈夜

哭金精仍頽朱光以渥萬邦宅心駿民效足堂堂蕭公
王蹟是因綢繆獻后無競惟人外濟六師內撫三秦拔
奇夷難邁德振民體國垂制上穆下親名蓋羣后是謂
宗臣平陽樂道在變則通爰淵爰嘿有此武功長驅河
朔電擊壤東協策淮陰亞蹟蕭公文成作師通幽洞冥
永言配命因心則靈窮神觀化望景揣情鬼無隱謀物
無遁形武關是闢鴻門是寧隨難滎陽即謀下邑銷印
甚廢推齊勸立運籌固陵定策東襲三王從風五侯允

集霸楚實喪皇漢凱入怡顏高覽彌翼鳳戢託跡黃老
辭世却粒曲逆宏達好謀能深游精杳漠神跡是尋重
玄匪與九地匪沉伐謀先兆擠響于音竒謀六奮嘉慮
四迴規主于足離項于懷格人乃謝楚翼實摧韓王窘
執胡馬洞開迎文以謀哭高以哀灼灼淮陰靈武冠世
策出無方思入神契奮臂雲興騰跡虎噬凌險必夷摧
堅則脆肇謀漢濱還定渭表京索既扼引師北討濟河
夷魏登山滅趙威亮火烈勢踰風掃拾代如遺偃齊猶草

二州肅清四邦咸舉乃眷北燕遂表東海克滅龍且爰
取其旅劉項懸命人謀是與念功惟德辭通絕楚彭越
觀時攷迹匿光民具爾瞻翼爾鷹揚威凌楚域質委漢
王靖難河濟即宮舊梁烈烈黥布眈眈其眄名冠强楚
鋒猶駭電覩幾蟬蛻悟主革面肇彼泉風翻為我扇天
命方輯王在東夏矯矯三雄至于垓下元凶既夷寵祿
來假保大全祚非德孰可謀之不臧舍福取禍張耳之
賢有聲梁魏士也罔極自貽伊媿俯思舊恩仰察五緯

脫蹟連難披榛來洎改策西秦報辱北冀悴葉更輝枯
條以肆王信韓孽宅土開疆我圖爾才越遷晉陽盧綰
自微婉變我皇跨功踰德祚爾輝章人之貪禍寧為亂
亡吳芮之王祚由梅銷功微勢弱世載忠賢肅肅荆王
董我三軍我圖四方殷薦其勛庸親作勞舊楚是分往
踐厥宇大啟淮瀆安國違親悠悠我思依依拊母既明
且慈引身伏劍永言固之淑人君子寔邦之基義形於
色憤發於辭主亡與亡永命是期絳侯質木多略寡言

曾是忠勇惟帝攸歎雲鶩靈丘景逸上蘭平代禽豨奄
有燕韓寧亂以武斃呂以權滌穢紫宮徵帝太原實惟
太尉劉宗以安挾功震主自古所難勲耀上代身終下
藩舞陽道迎延帝幽藪宣力王室匪惟厥武總干鴻門
披闥帝宇聳顏誚項掩淚寤主曲周之進于其哲兄俾
率爾徒從王于征振威龍蛻據武墉城六師寔因克荼
禽黥猗歟汝陰綽綽有裕戎軒肇蹟荷策來附馬煩轡
殆不釋擁樹皇儲時又平城有謀潁陰銳敏屢為軍鋒

奮戈東城禽項定功乘風藉響高步長江收吳引淮光
啓于東陽陵之勛元帥是承信武薄伐揚節江陵夷王
殄國俾亂作懲恢恢廣野誕節令圖進謁嘉謀退守名
都東規白馬北距飛狐即倉敖庾據險三塗輜軒東踐
漢風載徂身死于齊非說之辜我皇寔念言祚爾孤建
信委輅被褐獻寶指明周漢銓時論道移帝伊洛定都
鄴鎬柔遠鎮邇寔敬攸考抑抑陸生知言之貫往制勁
越來訪皇漢附會平勃夷凶翦亂所謂伊人邦家之彥

百王之極舊章靡存漢德雖朗朝儀則昏稷嗣制禮下
肅上尊穆穆帝典煥其盈門風晞三代憲流後昆無知
獻敏獨昭奇蹟察侔蕭相貺同師錫隨何辯遠因資於
敵紓漢披楚維生之績皤皤董叟謀我平陰三軍縞素
天下歸心素生秀朗沉心善照漢旆南振楚威自撓大
略淵回元功響效邈哉維人何識之妙紀信誑項軫軒
是乘攝齊赴節用死孰懲身與煙消名與風興周苛慷
慨心若懷冰形可以暴志可以凌貞軌偕沒亮蹟雙升

帝疇爾庸後嗣是膺天地雖順王心有違懷親望楚永
言長悲侯公伏軾皇媼來歸是謂平國寵命有輝震風
過物清濁效響大人于興利在攸往弘海者川崇山惟
壤韶濩錯音袞龍比象明明衆哲同濟天網劍宣其利
鑒獻其朗文武四克漢祚克廣悠悠遐風千載是仰慮一
作聲于足作以足哭作送烈作列惟德作
推德輝作耀守作官愾作慨天地作天命

晉書限斷議

三祖實終為臣故書為臣之事不可如傳此實錄之謂

也而名同帝王故自帝王之籍不可以不稱紀則追王

之義

初學記

大田議

臣聞隆古之主不改法而下治陵夷之世不易術而民
怠夫商人逸而利厚農人勞而報薄導農以利則耕
夫勤節商以法則游子歸

丞相箴

夫導民在簡為政以仁仁實生愛簡亦易遵網疏下

睦禁密巧繁深文碎教伊何能存故人不可以不審任
不可以不忠捨賢昵讒則喪爾邦且偏見則昧專聽悔
疑耳目之用亦各有期夫豈不察而惟牆隔之矜己任
智是蔽是欺德無遠而不復惡何適而不追存亡日鑒
成敗代陳人咸知鏡其貌而莫能照其身

孔子贊

孔子叡聖配天弘道風扇玄流思探神寶明發懷周興
言謨老靈魄有行言觀蒼昊清歌先誠丹書有造

王子喬贊

毛詩古音攷載管叔鮮贊公旦居攝三監叛亡或放或殛并禍武庚

遺形靈岳顧景忘歸乘雲倏忽飄飄紫微

吳大帝誄

我皇明明固天寔生體和二合以察三精濯暉育慶懷
祥載榮率性而和因心則靈厥靈伊何克聖克仁茂對
四象克配乾坤齊明日月攷祥鬼神誕自幼冲獻哲宿
照甄化無形探景絕曜巍巍聖姿文武既俊有覺德徽
兆民欣順將熙景命經營九圍登蹟岱宗班瑞舊圻上

玄匪惠蚤零聖暉神廬既考史臣獻貞龍輶啟殯霄載
紫庭辰旒飛藻凶旗舉銘崇華熠爍翠蓋繁纓千乘結
駟萬騎重營簫鼓振響和鑾流聲動軫閭闔永背承明
顯步萬官幽驅百靈隨化太素即宮杳冥億兆同慕泣
血如零

愍懷太子誄

明明皇子成命既駿保乂皇家載生淑胤茂德克廣仁
姿朗雋當克無疆光紹有晉如何不弔暴離咎艱曾是

邁愍匪降自天肇傾運祚遂喪華年嗚呼哀哉沉雲既
祛日月增暉靈寵可贈冤魂難追舊物東反靈柩西歸
傷我惠后寂焉翳滅銜哀駿奔凶服就列追慕徽塵興
言斷絕敢誅遺風庶存芳烈其辭曰

巍巍皇基奕奕紫微有命既集天祿永綏篤生太子纂
德承茂平紹大烈時惟洪胄奇穎發翹清藻在秀誕自
幼蒙逮事武皇展矣太子播此瓊芳允矣聖祖無言不
臧婉孌乘輿名裕德昌龍集庚戌日月改度赫赫明明

我皇登祚厥登伊何皇統是荷華紱重采翠蓋垂葩鸞
旗阿那玉衡吐和聿來在宮體亮而誠肅雍皇極思媚
紫庭亦既涉學遵師盛道何年之竅而察之蚤讜言必
復乖義則考惟天有命太子膺之惟皇有慶太子承之
當究遐年登茲胡考緝熙有晉克構帝宇如何晨牝穢
我朝聽仰索皇家惟臣明聖惴惴太子終溫且敬銜辭
即罪掩淚祇命顯加放流潛肆鴆毒痛矣太子乃離斯
酷謂天蓋高訴哀靡告鞠躬引分顧景摧剥嗚呼哀哉

凡民之喪有戚有姻太子之歿傍無昵親跼蹐嚴宮絕
命禁聞幽柩偏寄孤魂曷歸嗚呼太子生寃歿悲匹夫
有怨尚或殞霜矧乃太子萬邦攸望普天扼腕率土懷
傷精感六沴咎徵紫房爰茲元輔啟我令圖王赫斯怒
天誅靡逋攬搶叱掃元凶服辜仁詔引咎哀策東徂光
復寵祚紹建藐孤於時暉服粲焉畢陳庭旅舊物堂有
故臣孰云太子不見其人嗚呼哀哉既濟洛川靈旆左
迴三軍悽裂都邑如憤慨矣寤歎念我愍懷

吳貞獻處士陸君誄

我聞有命天祿有秩如斯古人而有斯疾兄弟之恩離
形合氣矧我與君年相亞逮綢繆之遊自矇及朗孩不
貳音抱或同襁撫髻並育攜手相長行焉比跡誦必共
響庶君偕老靈根克固附翼雲霄雙飛天路人皆年長
君獨短祚穀則同朝逝矣先暮

吳丞相江陵侯陸公誄

根條伊何苗黃喬舜長發有祥貽我作盾劉王負險寇

我西隣公侯赫怒干戈啟陳金鉞鏡日雲旗降文元玉
隕難鯨鯢陸鱗戎漠時殪方域清塵

吳大司馬陸公誄

我公承軌高風肅邁明德繼體徽音奕世昭德伊何克
俊克仁德周能事體合機神禮交徒侯敬睦白屋蹶蹢
曲躬吐食揮沐爰及鰥寡賑此惇獨孚厥惠和脫驂分
祿乃命我公誕作元輔位表百辟名茂羣后因是荆人
造我寧宇備物典策主冠及斧龍旂飛藻靈鼓樹羽質

文殊塗百異行徹人玩其華鮮識其實於穆我公因心
則括經綸至道終始自結德與行滿美與言溢

晉劉處士參妻王氏夫人誄

猗猗嘉穎朝陽方翹烈風嚴霜殞此秀條璇璣條忽四
序競征清商激宇蟋蟀吟樞

吳大司馬陸公少女哀辭

冉冉晞陽不遂其茂暉暉芳華彫芳落秀遵堂涉室髣
髴興想人皆有聲爾獨無響

弔魏武帝文

并序
載文選

元康八年機始以臺郎出補著作游乎祕閣而見魏武帝遺令愴然歎息傷懷者久之客曰夫始終者萬物之大歸死生者性命之區域是以臨喪殯而後悲覩陳根而絕哭今乃傷心百年之際興衰無情之地意者無乃知哀之可有而未識情之可無乎機答之曰夫日蝕由乎交分山崩起於朽壤亦云數而已矣然百姓怪焉者豈不以資高明之質而不免卑濁之累居常安之勢而

終嬰傾離之患故乎夫以迴天倒日之力而不能振形骸之內濟世夷難之智而受困魏闕之下已而格乎上下者藏於區區之木光于四表者翳乎蕞爾之土雄心摧于弱情壯圖終於哀志長算屈於短日遠跡頓於促路嗚呼豈特瞽史之異闕景黔黎之怪顏岸乎觀其所以顧命冢嗣貽謀四子經國之略既遠隆家之訓亦弘又云吾在軍中持法是也至於小忿怒大過失不當效也善乎達人之讜言矣持姬女而指季豹以示四子曰

以累汝因泣下傷哉曩以天下自任今以愛子託人同
乎盡者無餘而得乎亡者無存然而婉孌房闥之內綢
繆家人之務則幾乎密與又曰吾姨好妓人皆著銅雀
臺於臺堂上施八尺牀張總帳朝晡上脯糒之屬月朝
十五日輒向帳作妓汝等時時登銅雀臺望吾西陵墓
田又云餘香可分與諸夫人諸舍中無所為學作履組
賣也吾歷官所得綬皆著藏中吾餘衣裘可別為一藏
不能者兄弟可共分之既而竟分焉亡者可以勿求存

而獨奏進脯糒而誰嘗悼總帳之冥漠怨西陵之茫茫
登雀臺而羣悲貯美目其何望既睎古以遺累信簡禮
而薄葬彼裘紱於何有貽塵謗於後王嗟大戀之所存
故雖摺而不忘覽遺籍以慷慨獻茲文而悽傷

弔蔡邕文

彼洪川之方割豈一簣之所埋故尼父之惠訓智必愚
而後賢諒知道之已妙曷信道之未堅忽甯子之保己
效長叔之違天冀澄河之遠日忘朝露之短年

晉平西將軍孝侯周處碑

鼎按元康七年周處戰死陸機于太安二

年見殺明年永興元年正月改永安七月又改建武今處碑乃云建武元年追贈太興二年葬則贈時機亡年餘矣而太興為東晉元帝年號相距猶遠其文當非機作也碑集王

羲之字見在宜興

君諱處字子隱義興陽羨人也氏胄曩興煥乎墳典華宗往茂鬱其簡書啟三十之洪基源流定鼎運八百之遠祚枝葉封桐軒蓋列於漢庭蟬冕播於陽羨二南之價傳不朽而紛敷大護之音聲無徵而必顯山高海濶

其在斯焉祖賓少折節蚤亡吳初召諮議參軍舉郡上
計轉為州辟從事別駕步兵校尉光祿大夫廣平太守
父鮒少好學舉孝廉吳寧國長奮威長史懷安錢塘縣
侯丹陽西部屬國都尉持節校尉拜裨將軍三部都督
太中大夫臨川豫章都陽太守晉故散騎常侍新平廣
漢二郡太守封關內侯簪紱揚名臺閣標著風化之美
奏課為能亭亭孤美灼灼橫劭徇高位於生前思垂名
於身後遂以罕言不違應期出輔洋洋之風俯冠來葉

巍巍之盛仰繼前賢君乃蚤孤不弘禮制年未弱冠膺
力絕於天下妙氣挺於人間騎獵無疇時英武慕縱情
寡偶俗弊不忻鄉曲誣其害名改節播其聲譽遂來吳
事余厥弟謹然受誨向道朝聞方勵志而淫詩書便好
學而尋子史文章綺合藻思羅開吳朝州縣交辟太子
洗馬東觀左丞中書右丞五官郎中左右國史靖恭夙
夜恪居官次遷尚書僕射東觀令太常卿無難督匡
熙庶績朝廷謚寧使持節大都督淦中京下諸軍事封

章浦亭侯國猶多士君實得賢汪洋廷闕之傍昂藏寮
案之上射獸功猶見顯刺蛟名乃遠揚忠烈道自克修
義節情還永布琳瑯梓杞珪璧棟梁君著默語三十篇
及風土記并撰吳書於是吳平八晉王渾登建業宮醴
酒既酣乃謂君曰諸人亡國之餘得無戚乎君對曰漢
未分崩三方鼎立魏滅於前吳亡於後亡國之戚豈惟
一人渾乃大慙仕晉稍遷總統初入拜諮議郎除討虜
護軍新平太守撫和戎狄叛羌歸附雍土美之轉為廣

漢太守郡多滯訟有經三十年不決者處以評其枉直一朝決遣以母年老罷歸尋除楚內史未之官徵散騎常侍處曰古人辭大不辭小乃先之楚而郡既經喪亂新舊雜居風俗未一處敦以教義又撿尸無主及白骨在野收而葬之然後就徵遠近稱嘆及居近侍多所規諷遷御史中丞正繩直筆凡所糾劾不避寵戚梁王彤違法處深文案之及氏人齊萬年反朝臣惡其強直皆曰處吳之名將子也忠烈果毅庶僚振肅英情天逸遠

性霞騫陝北留棠遂有二天之詠荆南度虎猶標十部
之書尋轉散騎常侍輕車將軍迴輪出於新平士女揮
淚褰帷望於廣漢雞犬靡喧振茲威略宣其惠和晉京
遙仰部從迎欽是時氐賊作逆有衆七萬屯於梁山朝
廷推賢以君才兼文武詔授建威將軍以五千兵奉辭
西討忠概盡節不顧身命乃賦詩曰去去世事已策馬
觀西戎藜藿甘梁黍期之克令終言畢而戰自旦及暮
斬首萬級絃絕矢盡番系不救左右勸退處按劍怒曰

此是吾劾節授命之日何以退為大臣以身殉國不亦可乎韓信背水之軍未遑得喻工輸紫帶之勢蚤擬連蹤莫不梯山架壑襁負來歸戎士扞其封疆農人展其耕織秋風才起追戰虜於雷霆春水方生揮鋤同於雲雨立功立事名將名臣者乎元康九年舊疾增加奄捐館舍春秋六十有二天子以大臣之葬師傅之禮親臨殯壤建武元年冬十一月甲子追贈平西將軍封清流亭侯謚曰孝禮也賜錢百萬葬地一頃京城地五十畝

為第又賜王家田五頃詔曰處母年老加以逆旅遠人
朕每憫念給其醫藥酒米賜以終年以太興二年歲在
己卯正月十日葬於義興舊原南瞻荆岳崇峻極之魏
哉北睇蛟川濬清流之澄澈娶同郡盛氏有四子靖玘
札碩並皆志性純孝過禮喪親墳前之樹染淚先枯庭
際之禽聞悲乃下遂作銘曰

周南著美岐山表靈葉繁漢室枝茂晉庭皎皎夫子奇
特播名幼有異行世存風烈蚤馳問望晚懷耿節頗尚

英雄昇名禁闕捨爵策勲允歸明哲輝赫大晉封豕多
故式揚廟略克清天步海濱既折江淮並汴漢水作藩
條章斯布俗歌揆日人謠何暮忠貞作相追蹤絳侯將
亭嘉茂遽掩芳猷潛光陽旬返旆吳丘舊關雖入鄉路
冥浮鐫茲幽石萬代千秋

陸遜碑銘叙

魏大司馬曹休侵我北鄙乃假公黃鉞統御六師及中

軍禁衛而攝行王事主上執鞭百司屈膝

吳志注


要覽三卷自序

直省之暇乃集要術三篇上曰連壁集其嘉名取其連
類中曰述聞寔述余之所聞下曰析名乃搜同辨異

顧譚傳

宣太子正位東宮天子方隆訓導之義鈔簡俊彥講學
左右時四方之傑畢集太傅諸葛恪等雄奇蓋衆而譚
以清識絕倫獨見推重自大府范慎謝景羊徽之徒皆
以秀稱其名而悉在譚下

吳志注



西晉文紀卷十五